

癖嗜部杂录

贵耳集汉人尚气好博晋人尚旷好醉唐人尚文好
狎本朝尚名好贪

道山清话人问邵尧夫人有洁病何也尧夫曰胸中
滞碍而多疑耳未有人天生如此也初因多疑积渐
而日深此亦未为害但疑心既重则万境皆错最是
害道第一事不可不知也

太平清话香令人幽酒令人远石令人隳琴令人寂
茶令人冷月令人孤棋令人闲杖令人轻水令人空
雪令人旷剑令人悲蒲团令人枯美人令人怜僧令
人淡花令人韵金石鼎彝令人古

癖嗜部纪事

左传定公三年邾子在门台临廷阍以瓶水沃廷邾
子望见之怒阍曰夷射姑旋焉

注旋

小便

命执之弗得滋

怒自投于口废于炉炭烂遂卒先葬以车五乘殉五
人庄公卞急而好洁故及是

楚语屈到嗜芰有疾召其宗老而属之曰祭我必以
芰及祥将荐芰子木曰不然祭典有之曰不羞珍异
不陈庶侈夫子不以其私欲干国之典遂不用

晋书杜预传时王济解相马又甚爱之而和峤颇聚
斂预常称济有马癖峤有钱癖武帝闻之谓预曰卿
有何癖对曰臣有左传癖

异苑东莞刘邕性嗜食疮痂以为味似鳊鱼尝诣孟
灵休灵休先患灸疮痂落在口邕取食之灵休大惊
痂未落者悉褫取饴邕南康国吏二百许人不问有
罪无罪递与鞭疮痂常以给膳

宋书庾炳之传炳之性好洁士大夫造之者去未出
户辄令人拭席洗口时陈郡殷冲亦好净小史非净
浴新衣不得近左右士大夫小不整洁每容接之炳
之反是冲每以此讥焉

南齐书王思远传思远清修立身简洁衣服口筵穷

治素净宾客来通辄使人先密覘视衣服垢秽方便不前形仪新楚乃与促膝虽然既去之后犹令二人交帚拂其坐处

南史何佟之传佟之性好洁一日之中洗涤者十余过犹恨不足时人称为水淫又有遂安令刘澄为性弥洁在县扫拂郭邑路无横草水剪虫秽百姓不堪命坐免官

云仙杂记王维居辋川宅宇既广山林亦远而性好温洁地不容浮尘日有十数扫饰者使两童专掌缚帚而有时不给

唐书独孤及传及晚嗜琴有眼疾不肯治欲听之专也

姜师度传师度喜渠漕所至由役纷纭不能皆便然所就必为后世利是时太史令傅孝忠以知星显时为语曰孝忠知仰天师度知相地嘲所嗜也

北梦琐言唐朱崖李太尉与同列款曲或有征其所好者掌武曰喜见未闻言新书策崔魏公铉好食新头以为珍美从事开筵先一夕前必到使院索新煮头也杜翮公每早食馈饭干脯崔侍官安潜好看斗牛虽各有所美而非近利与夫牙筹金埒钱癖谷堆不亦远邪

轩渠录米元章喜洁金陵人段拂字去尘登第元章见其小录喜曰观此人名必洁人也亟造议亲以女妻之

避暑录话沈翰林文通喜吏事每觉有疾药餌未验亟取难决词状连判数百纸落笔如风雨意便欣然韩持国喜声乐遇极暑辄求避屡徙不如意则卧一榻使婢执板缓歌不绝声展转徐听或颌首抚掌与之相应往往不复挥扇范德孺喜琵琶暮年苦夜不得睡家有琵琶箏二婢每就枕即使杂奏于前至熟寐乃方得去人性固不能无喜好亦是不能处闲故必待一物而后遣余少时苦上气每作辄不能卧药餌起居须人乃能办侍先君官上饶一日秋晚游鹅湖中夕疾作使令既非素所知篋中适不以药行喘

慙顷刻不度起吹灯据案偶见一易册取读数十板
不觉遂平自是每疾作辄用此术多愈于服药然均
不免三公之累也

可谈王舒王越国吴夫人性好洁成疾王任真率每
不相合自江宁乞骸归私第有官藤口吴假用未还
郡吏来索左右莫敢言王一旦跣而登口偃仰良久
吴望见即命送还

舒王吴夫人有洁疾其意不独恐污己亦恐污人长
女之出省之于江宁夫人欣然裂绮縠制衣将赠其
甥皆珍异也忽有猫卧衣笥中夫人即叱起婢揭衣
置浴室下终不肯与人竟腐败无敢收者余大父至
贫挂冠月俸折支得压酒囊诸子幼时用为胫衣先
公痛念兹事既显尽以俸颁昆弟宗族终身不自吝
一钱诸父仰禄以活不治生事晚年迁谪族人失俸
大有狼狽者五叔父遂不聊生余窃谓使舒王与大
父易地吴夫人安得有此疾

辍耕录毗陵倪元镇有洁病一日眷歌姬赵买儿留
宿别业中心疑其不洁俾之浴既登榻以手自顶至
踵且扞且嗅复俾浴凡再三东方既白不复作巫山
之梦徒赠以金赵或自谈必至绝倒

明外史倪瓚传瓚为人有洁癖盥濯不离手偶俗客
造其庐客去必为洗涤其处

妮古录白鹿口陆樗自叹有兰亭癖